



Inatsisartunut ilaasortaq  
Niels Thomsen  
/maani

### § 37 naapertorlugu apeqqutip nr. 2011-92-p akineqarnera

Asasara Niels Thomsen

Oqoqarneq pillugu apeqqutigisannut qujallunga apeqqutigineqartut tulleriissillugit tulluut-tuni akissuteqarfissavakka:

#### Apeqqut 1

**Kiap akisussaaffigivaa nalilersussallugu pisortat illuutaat suliffeqarfiutaalluunniit soorlu assersuutigalugu atuakkanik atorniartarfik, ulluunerani paaqqinnittarfik imaluunniit atuarfik oqoqalersimanersoq imatut annertutigisumik illu matuneqar-tariaqarluni tamatumunngalu inatsisit suut tunngaviuppat?**

#### Akissut:

Sulinermi avatangiisit pillugit inatsimmi inissiat pinnatik suliffeqarfiit malittarisassiuunne-qarput. Sulisitsisup sulinermi avatangiisit pillugit inatsimmi maleruagassanik eqqortitsi-nissani akisussaaffigaa, taamaalilluni suliaq isumannaatsuunissap peqqinnissallu tu-ngaasigut tamakkiisumik illersorneqarsinnaasumik ingerlassinnaaqullugu.

Soorlu assersuutigalugu atuakkanik atorniartarfimmi, ulluunerani paaqqinnittarfimmi a-tuarfimmiluunniit malunnartumik oqummik eqqorneqartumi sulisunut sulisorineqartunut sulinermi avatangiisit qulakkeerneqarnissaannik sulisitsisoq akisussaavoq. Tamanna ersepoq Kalaallit Nunaanni sulinermi avatangiisit pillugit inatsimmi § 32, imm. 1-imi aamma §34, imm. 1, kiisalu Suliap suliarineqarnera pillugu Kalaallit Nunaannut nalu-naarummi § 6, imm. 1-imi.

Oqummik pasitsaassisoqartillugu sulisitsisoq, soorlu pisariaqarpat immikkut ilisimasa-limmik, misissuinernik, misiliinernik misissuititsinernillu aallartitsisinnaavoq;- sulinermi atugassarititat isumannaatsuunik peqqinnissakkullu illersorneqarsinnaanersut paasi-niarlugu.

Sullivinnik Nakkutilliisoqarfiup sulinermi avatangiisit pillugit inatsisip Kalaallit Nunaanni suliffinni malinneqarnera soq nakkutigissavaa.

Sullivinnik Nakkutilliisoqarfik sulisitsisumut peqqussuteqarsinnaavoq sulisut oqummik peqqissutsikkut sunnerneqannginnissaat qulakkeeqqullugu, suliffimmut misissuiartor-nermi paasineqarpat illut malunnartumik oqummik eqqorneqarsimasut.

06. Juni 2011  
Sagsnr. 2011-046776  
Dok. Nr. 640330

Postboks 1601  
3900 Nuuk  
Tlf. (+299) 34 50 00  
Fax (+299) 32 56 00  
E-mail: isiin@nanoq.gl  
www.nanoq.gl

## Apeqquut 2

**Kiap akisussaaffigivaa nalilersussallugu inissiaq attartugassaq oqoqalersimanersoq imatut annertutigisumik attartortoq pisinnaatitaaffeqarluni ini qimassinnaalugu nutaamillu attartugassarsilluni tamatumunngalu inatsisit suut tunngaviuppat?**

### **Akissut:**

Ineqarnermut, Attaveqarnermut Angallanermullu Naalackersuisoqarfik nalunaarpoq inissianut attartortittakkanut maleruagassat Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi takuneqarsinnaasut. Tassani imatut allassimasoqarpoq: "Namminersornerullutik Oqartussat kommunillu inissiaataanni attartortittakkani illuutit attartortitallu isumannaatsumik aserfallatsaaliorneqarnissaasa isumagineqarnissaa attartortitsisup pisussaaffigaa. Avammut kuuffinnut, kiassarnermut, innaallagissamut, gassimut imermullu teknikikkut atortulersuutit tamarmik pitsaasuutinnegassapput atorsinnaassuseqassallutillu. Taamatuttaaq innaallagissamut ikkuffiit, iikkius-sat, matserfiit, kiassaait, ruujorit, iliitsiviit alaakkaasut, illup iluani atortut il.il. aserfallat-saalissallugit attartortitsisup pisussaaffigai. Nungullarnikkut pisoqalinikkullu ajorseriaatsit kingunerisaannik ima akulikitsigisumik isumagineqartassapput nutarterinerit iluarsaassinerillu illuutit attartorneqartullu pissusissaat eqqarsaatigalugit pisariaqartitsinerit malillugit suliarineqartassallutik. Piffissami attartorfiusumi attartortup inissiami qilaat qalipallugit qaqorsarnissaat, iikkat qalipannissaat aamma/imaluunniit ungalitserorneqarnissaat kiisalu naqqisa lakkernissaat akisussaaffigaa taakkununngalu aningaasartuutit akilissallugit.

Attartortitsisup attartorneqartoq piffissamit attartornissap aallartiffissaaniit pitsaasumik isumannaatsumillu pitsaassuseqartillugu attartortumut atugassanngortissavaa. Ikkat, qilaat naqqillu nalinginnaasumik iluarsaanneqarsimassapput. Attartugassaq eqqiarneqarsimassaaq uumasuaqassananilu, igalaat, ilisiviit matui aamma matut ilivitsuussapput atorsinnaasunillu paarnaarsaateqassallutik. Kiisalu matut silarliit tamarmik immikkut marlunnik matuersaateqassapput, teknikikkullu atortulersuutit ajoquteqassanatik. Inissiamut iserternissamut atatillugu attartortitsisup attartortoq taannaluunniit sinnerlugu takkuttoq ilagalugu inissiaq takuniassavaat, inissiamullu iserternermut nalunaarusiussallutik, nalunaarusiallu assinganik attartortoq tunineqassaaq. Takuniaanermi amigaatit malugineqartut inissiamut iserternermut nalunaarusiamut ilanngunneqassapput. Amigaatit allat, attartortup inissiamut iserternermi kingorna tigusinermut atatillugu maluginiagai inissiamut iserternermiit sapaait akunneri marluk qaangiutsinnagit allakkatigut attartortitsisumut nalunaarutigineqassapput. Amigaatilli nalinginnaasumik misissuinermi takuneqarsinnaasimangippata imaluunniit attartortitsisoq peqquserlussimappat taman-na atuutissanngilaq. Attartortup attartorneqartoq isumannaatsumik paarissavaa, ajoqusikkanullu attartortup nammineq, attartortup inoqutaasa allaluunniit attartortup attartorneqartumut isersinnaatitaasa isumannangitsumik pissusilersornerisigut ajoqusersima-

saannut taarsiinissamut attartortoq akisussaavoq. Takusaanermi paarsinerluttoqarsimasooq paasineqarpat, attartortitsisup tamanna piumasarippagu attartortup ingerlaannartumik ajoqusikkat iluarsaatissavai.”

Oqummik pasitsaassisoqartillugu attartortut attartortitsisumut imaluunniit taassuma aqutsisuanut saaffigninninnaapput. Namminersorlutik Oqartussat inissiaataannut tungnatillugu A/S Inissiaatileqatigiiffik INI saaffigineqassaaq, tamannalu pisinnaavoq oqarasuaatikkut, allakkatigut imaluunniit INI-p nittartagaatigut qarasaasiakkut immersuinikkut. Tamatuma kingorna INI-miit attartortoq alakkarneqassaaq inissiamiillu oqoqarneranik misiligummik tiguisoqarluni. Misiligut Teknologisk Institut-imut nassiunneqassaaq, inernerilu pigineqalerpata INI-p iliuusissamik pisariaqartinneqartumik aallartitsissaaq. Misiligut oquttaqarpat inissiami immikkoortortap aningaasatigut atorsinnaasaasa iluanni INI iluarsaanermik aallartitsissaaq. Annertuumik ajortoqarsimappat attartortoq iluarsaanerup nalaani allamut nuutsinneqarsinnaavoq.

2010-mi ukiakkut INI-p nuna tamakkerlugu paasititsiniaaneq “Oqok akiorlugu” aallartippaa. Paasititsiniaanermi oqaatiginiarneqarpoq attartortut namminneerlutik illup iluata peqqinnartuunissaanik pilersitsisinnaasut. Pinaveersaartitsinermi oqaatiginiarneqarpoq inissiami isugutammik pilersoqartarmat, eqqiaanermilu atortut immikkut ittut atorlugit eqqiaasoqarsinnaammatt oqok inissiami nassaassaalereersimappat.

Ineqarnermut, Attaveqarnermut Angallanermullu Naalakkersuisoqarfik aammattaaq nalunaarpoq inissiami isugutammik oqoqalernemillu nassaarfiusumi sanaartorneq pillugu inatsimmi maleruagassanik eqqortitsinnginnikkut eqqorneqartuni imaluunniit amigartumik aserfallatsaaliinermik pissuteqartumik eqqorneqartuni sanaartorneq pillugu inatsit malillugu unioqqutitsinertut isigineqarsinnaammata (Sanaartorneq pillugu Inatsisartut inatsisaat nr. 13, 26. maj 2010-meersoq).

Sanaartorneq pillugu inatsimmi § 10 malillugu piginnittuusup akisussaaffigaa sanaartorneqartup pitsaasuutinneqarnissaa, taamaalilluni najugaqartunut ulorianaateqassanngimmat allatulluunniit amigaateqarluni. Sanaartorneq pillugu inatsimmi § 16 naapertorlugu pissutsinik, inatsimmut matumunnga aammalu inatsit naapertorlugu peqqussusiarineqartunut uniuuttunik iluarsiinissaaq sukkulluunniit sanaartukkamik piginnittup pissaaffigaa.

Sanaartorneq pillugu inatsimmi § 18, imm. 3 malillugu kommunalbestyrelsip unioqqutitsisoqartoq paasiguniuk inatsisit malinneqarnissaat anguniartussaavaa.

### **Apeqqu 3**

**Oqummik siaruaattoqartillugu suliffeqarfik eqqorneqartillugu aammalu inissiaq**

## **eqqorneqartillugu inatsisitigut sukut nikingasoqarpa?**

### **Akissut:**

Sulinermi avatangiisit pillugit inatsit, tassani ilanngullugu oqoqarnermut maleruagassat, atorneqartassaaq sulisitsisumut sulianik ingerlatsisoqartillugu. Tamanna apeqqu 1-imi akineqarpoq.

## **Apeqqu 4**

### **Pasittaassisimangaanni suliffeqarfigisaq imaluunniit inissiaq oqoqalersimasooq taava sumut saaffiginnittoqassua aammalu taassumap kingorna susooqassua?**

#### **Akissut:**

Kikkut tamarmik suliffimmi sulinermi avatangiisinut ajornartorsiortut Sullivinnik Nakkutillisoqarfimmut saaffiginnissinnaapput. Tamatuma kingorna Sullivinnik Nakkutillisoqarfiup nalilissavaa saaffiginnineq misissuiartortitsinermik kinguneqassanersoq.

Ineqarnermut, Attaveqarnermut Angallanermullu Naalakkersuisoqarfiup nalunaarutigigaa suliffigisami sulisitsisumut imaluunniit sulisut sinnisaannut ajornartorsiummik ilisimatitsisoqartassamat. Inissiami attartortittakkami najugaqartup ajornartorsiut attartortitsisumut ilisimatitsissutigissavaa.

Attartortitsisup amigartumik aserfallatsaaliineranik pissuteqartumik imaluunniit sanaartorneq pillugu inatsimmik akerliusumik iliortoqarneratigut oqummik pilersooqarsimappat attartortoq kommunimut saaffiginnilluni kommunalbestyrelsip sanaartorneq pillugu inatsit malillugu nakkutillinissamik pisussaaffeqarnini malillugu suliamut akuliunnissaanik qinnuiginnissinnaavoq.

Kommunalbestyrelsip sanaartorneq pillugu inatsimmi § 18 malillugu sanaartorneq pillugu inatsit sanaartornermilu maleruagassat eqqortinneqarnersut nakkutigisussaavai. Kommunalbestyrelsi aamma qisuariartussaavoq unioqutitsisoqarneranik paasisaqaruni imaluunniit tamatumingaa tunngavissaqarluni pasitsaasaqaruni.

Isugutak oqoqalernerlu sanaartornermut inatsimmik amigartumik malinninnermik imaluunniit amigartumik aserfallatsaaliinermik pissuteqartumik pilersimappata sanaartornermut inatsit malillugu unioqutitsinertut isigineqarsinnaapput. Assersuutigalugu taaneqarsinnaapput oqorsaatissanut piumasaqaatinut amigartumik paasinninnerit, silaannarissarfinnut piumasaqaatinut amigartumik paasinninnerit, matuni igalaanilu amigartumik ussisaateqarnerit, qaliaq ussiitsoq imaluunniit erngup kuuffiisa aqqaasa putusi-manerat.

Sanaartorneq pillugu inatsit malillugu unioqutitsisoqarsimappat kommunalbestyrelsi qisuariassalluni pisussaaffeqarpoq, tak. inatsimmi § 18, imm. 3. Kommunalbestyrelsip, tamanna pisariaqartutut nalilerneqarpat, attartortitsisoq qinnuiginnissavaa pisoq suku-

miinerusumik misissoqqullugu, soorlu sanaartorneq oqoqarnerlu teknikip tungaatigut misissuiffigeqqullugit.

Kommunalbestyrelsip sanaartorneq pillugu inatsimmi § 16 malillugu attartortitsisoq peqqusinnaavaa pisoq unioqqutinneqartoq iluarseqqullugu, piffissap aalajangersimasup iluani oquk tassungalu pissutaasut peeqqullugit.

Inussiarnersumik inuulluaqqusillunga



Ove Karl Berthelsen